

Ana Reirei Iesu

Iroun Unimwaane Dallin H. Oaks

Man te Kooram n Abotoro n te Tengaun ma Uoman

Iesu Kristo bon Ti Ana Riki Temanna ae Tangiraki te Atua. ... Ngaia bon te Tia Kamaiura man ara bure ao man te mate. Aio te kabanea ni kakawaki n atatai n te aonaaba.

“Tera nanomi nakon Kristo?” (Mataio 22:42). Ma taeka aikanne Iesu E kangoia tenaan Bwaritaio n Ana bong. Ma taeka aika ti tebo aikanne I titirakiniia raou Aika Itiaki ni Boong Aika Kaitira ao Kiritian riki tabeman te bwai ae ko kakoaua ibukin Iesu Kristo ao tera ae ko karaoia ibukin te koaua anne.

Angiin au kibu a na reke man te Baibara, bukina bwa e rangin ni kinaki irouia angia Kiritian. Au rairairi e na bon roko man booki aika tabu, riki Ana Boki Moomon, e reireiniira nanon te Baibara booki aika tabu e rangin ni kamangaongao are e a karika te aki booraoi irouia aro ni Kiritian n nanona. I taetae nakoia taan kakoaua ma tabeman naba. N aron are e reireiniira Unimwaane Tad R. Callister n te ingabong aei, tabeman ake araniia bwa Kiritian a kamoamoia Iesu bwa te tia reirei ae tamaroa ma a rawa ni kakoaua Ana aro. I a tia ni kabonganai ana taeka Iesu Bon Irouna, n taetae nakoia. Ti riai ni bane n iangoia bwa tera raoi ae E iangoia Irouna bwa antai Ngaia ao tera ae E kanakoa nako aon te aba bwa e na karaoaki.

Ti Natina Te Riki Temanna

E reirei Iesu bwa Ti Natina te Riki Temanna. E taku:

“Bwa e tangiriia aomata te Atua n te aro are E anga Natina ae te Rikitemanna iai, bwa e aonga n aki mate ane onimakinna, ma e na reke irouna te maiu are akea tokina.

Bwa E aki kanakomaia Natina te Atua nako aon te aba bwa E na kabuakaka te aba; ma E kanakomaia bwa e na kamaiuaki te aba i Rouna.” (Ioane 3:16–17).

Te Atua te Tama E kamatoa aei. Inanon tokin te atatai ae tabu iaon Maungan te Oneaki n taekinna, E katanoata mai i Karawa. “Aio Natiu ae tangiraki teuae, ae I kakatonga i Rouna; ongo i Rouna” (Mataio 17:5).

E reirei naba Iesu bwa Kaotina bon ti tebo ma Tamana. E taetae Nakoia Ana Abotoro:

“Ngke tao kam a tia n ataai, ao kam ata naba Tama: ao imwiin ngkai ao kam ataia, ao kam a tia n noria.

“E taku Biribo nako Ina, Te uea, kaota te Tama nako ira, ao ti a tau iai.

E taku Iesu nako ina, I a maan ra ni mena i roumi, ao ko aki ataai, Biribo? ane e a tia n norai ao e a tia n nora naba te Tama” (Ioane 14:7–9).

Imwiina, ae te Abotoro Bauro e kabwarabwara te Nati “are boni katotongan arona ni koaua [Te Atua te Tama] n aomata” (Ebera 1:3; taraa naba 2 I Korinto 4:4).

Te Tia Karikibwai

E koroia te Abotoro Ioane bwa Iesu, are e atonga “te Taeka,” “e memena te uarei iroun te Atua ngke a tuai ni karikaki bwaai. A bane ni karikaki bwaai i Rouna; ao ngke tao akea Ngaia, ao e aki karikaki te bwai reuana ae karikaki” (Ioane 1:2–3). Ngaia, iaan ana babaire te Atua, Iesu Kristo bon te tia Kariki bwaai ni kabane.

Te Uea ae Atuaia Iteraera

N Ana mwakuri nakoia Ana aomata i Biritia, E reirei Iesu bwa Ngaia bon Iehova, te Uea ae Atuaia Iteraera (taraa Ioane 8:58). Imwiina, ngkai te Uea ae uti, E taetae ma Ana aomata n aban America. E taku:

“Nooria, bon Iesu Kristo Ngai, are a kakoaua ibukina burabeti bwa E na roko nakon te aonaaba. ...

“... Ngai Atuaia Iteraera, ao te Atua ibukin te aonaaba ae bwanin” (3 Nibwaa 11:10–11, 14).

Tera Ae A Tia ni Karaoia Ibukira

N te maungatabu ni kabuta n te titeiki n ririki aika mwaiti n nako, I kaitibo ma te aine ae taku bwa e a tia n tuangaki bwa e na oki nakon te ekaretia imwiin ririki aika mwaiti n nako n aki ata bukina bwa e aera e na karaoia. I kaunga nanona n taku, “Ngkana ko iangoi bwaai ake e a tia ni karaoi te Tia Kamaiu ibukira, e aki bati am iango n oki nakon te taromauri n nebo ao ni beku Ibukina?” I rangin ni mimi n ana kaeka: “Tera ae E a tia ni karaoia ibukiu?” Ibukia naake aki ataia bwa tera ae a tia ni karaoia te Tia Kamaiu ibukira, n na kaeka te titiraki anne n Oin ana taeka ao n oin au koaua.

Maiun te Aonaaba

Te Baibara e taumwin ana reirei Iesu: “I roko bwa e na reke te maiu i rouia. ao e na bati n reke i rouia” (Ioane 10:10). Imwina, inanon te Aonaaba ae Boou, E katanoata, “Ngai te oota ao maiun te aonaaba (3 Nibwaai. 11:11). Ngaia maiun te Aonaaba bukina ngkai Ngaia te Tia Karikibwai ao bukina, bwa rinanon Mangautina, ti bane ni kauringaki bwa ti na manga maiu riki. Ao te Maiu ae anganiira bon tiaki ti te maiu ae mamate. E reirei, “I anganiia te maiu ae aki toki; ao a na bon aki mate, ao akea ae anaiia mai baiu” (Ioane 10:28; taraa naba Ioane John 17:2).

Otan te Aonaaba

E reirei naba Iesu, “otan te aba ngai: ane irai ao e na bon aki nakonako n te ro” (Ioane 8:12). E taekinna naba, “Boni Ngai te kawai, ao te koaua, ao te maiu” (Ioane 14:6). Ngaia bon te Kawai ao Ngaia bon te ota bukina bwa e kaota kawaira Ana reirei n te maiu ae mamate ao ni kaota te kawai n oki nakon te Tama.

Karaoan ana Kantaninga te Tama

N taainako, Iesu E karinea te Tama ao E iria. Engae ngke te kairake E taekinna nakon Ana karo iaon te aba, “Kam aki ataa bwa N na kumea ana bwai Tamau?” (Ruka 2:49). “Bwa I ruo mai karawa,” Imwiina E reirei, “tiaki i bukin te karaoa oin nanou, ma i bon te karaoa nanon teuare E kanakomaiai” (Ioane 6:38; taraa naba Ioane 5:19). Ao te Tia Kamaiu e reirei, “Akea ane nako n te Tama, bwa ti Irou” (Ioane 14:6; taraa naba Mataio 11:27).

Ti oki nakon te Tama man karaoan Nanona. E reirei Iesu, “A aki bane n rin n uean te Atua akana kangai nako Iu, te Uea, Te Uea,; ma e na rin iai ane taua ana taeka Tamau are i Karawa” (Mataio 7:21). E kabwarabwara:

“Ane a na kangai nako Iu aomata aika bati n te bong arei, Te Uea, Te Uea, tiaki ti taetae ni burabeti n aram? Ao tiaki ti kanakoa te taimonio n aram? ao tiaki karaoi kakai aika bati n aram?

“Ao Ngai N na taku nakoia, I bon aki ataingkami ma ngkoa: nako mai Irou, ngkami aika kam kakaraoa ae buakaka” (Mataio 7: 22–23).

Antai ngkanne ae na rin n uean karawa? Tiaki naake a karaoi mwakuri aika tamaroa ni kabongana aran te Uea, E reirei Iesu, ma ti “ane taua ana taeka Tamau are i Karawa” (mwakoro 21).

Te Banna Ni Katoto ae Kororaoui

E kaotia Iesu nakoira aron karaoana. E aki toki ni kaoira bwa ti na Iria: “A ongo bwanaau au tibu, ao I kinaia, ao a irirai” (Ioane 10:27).

Mwakan te Nakoanibonga

E anganiia Ana Abotoro mwaakan te nakoanibonga (taraa Mataio 10:1) ao nakoia tabeman. Nakon Betero, te Abotoro ae a maan riki, E taku, “Ao N na anganiko kiining uean karawa: bwa a kana kam kabaea i aonaaba ao a na manga kabaeaki i karawa; ao ane kabwaraaki i aon te aba ao a na manga kabwaraaki i karawa” (Mataio 16:19; taraa naba Mataio 18:18).

Ruka e koroia ae “E rinea riki aomata te Uea ... itingaun naba, ao E kanakoia ni kakauomania I mwaina nakoni kaawa ni kabane ma taabo aika E kan nako iai.” (Ruka 10:1). Imwiina aika Itingaun aikai a tuanga Iesu ma te kimwareirei, “A bon ongo i roura taimonio n aram” (Ruka 10:17). Ngai te tia kakoaua ni mwaakan te nakoanibonga anne.

Kairiiri iroun te Tamnei ae Raoiroi

N tokin Ana mwakuri n te aonaaba, Iesu E reireinia Ana Abotoro, “Te Tia Buobuoki, are te Tamnei are Raoiroi, are E na kanakomaia te Tama n arau, e na reireingkami bwaai ni kabane, ao e na kauringkami bwaai ni kabane, ao E na kaururing I nanomi bwaai ni kabane ake I atongi nakoimi” (Ioane 14:26), ao “e na kairingkami nakon te koaua ni kabanea” (Ioanen 16:13).

Kairiiri man Ana Tua

E kairira naba man Ana tua. Ngaia ae E tuangiia Nibwaite bwa a na akea manga te itabarara ni kaineti ma te reirei, bukina bwa. E taku:

Are iai irouna tamnein te kakauntaeka ao bon tiaki ma irou, ma bon ma iroun te riaboro, are bon taman te kakauntaeka, ao e kakiriweei nanoia aomata bwa ana itabararaaa ma te un, imarenaia.

“Nooria bon tiaki au reirei, bwa N na kakiriweei nanoia aomata, bwa a na un, I marenaia, ma bon aio au reirei bwa ana riai ni kakeai bwaai aikai” (3 Nibwaai 11:29–30).

Iangoan te Maiu ae Akea Tokina

E kakaewenako naba nakoira bwa ti na katuka ara iango Irouna, tiaki ibukin bwain te aonaaba. N ana kabwarabwara ae rang kakawaki I aon te berena ni kamaiu, E

kabwarabwara Iesu te kaokoro i marenan te rabwata ao ao te amwarake ae akea tokina, “Kam na tai mwakuri ni karekea te amwarake ae kai mauna,” E taku, “ma kam na kakorakorai ngkami ni karekea te amwarake ae teimatoa nakon te maiu are aki toki, ane E na anganingkami Natin te Aomata” (Ioane 6:27). E reirei te Tia Kamaiu bwa boni Ngaia te Berena ni Kamaiu, ae reke ma iai te amwarake ae akea tokina. N taetae iaon te amwarake ae mamate ae reke man te aonaaba, n raonaki ma te maana are e a tia ni kanakoa Iehova bwa e na kamwarakeia natin Iteraera n te rereua, E reirei Iesu bwa naake a onimakina te berena aei ao a na mate (taraa Ioane 6:49–50). Ni kaitaraana, te amwarake are E anga “te berena ni kamaiu are E ruo mai karawa,” ao, E reirei, Iesu “ngkana e amwarake n te berena aei te aomata, ao e na maiu n aki toki” (Ioane 6:51).

Tabeman Ana reirei a taku bwa “E matoatoa te taeka anne” ao man te tai anne a mwaiti Ana reirei aika “a kerikaki ao a aikoa manga airiri ma ngaia” (Ioane 6:60, 66). E tara n ae aki butimwaea Ana reirei are mai imwaina are a riai ni “ukoukora ... moa uean te Atua” (Mataio 6:33). N te bong aei tabeman ake a kakoaua te Mwakuri ni Kiritian a rangin n anaaki riki nanoia ni bwain te aonaaba—bwaai ake kamatoa te maiu n te aonaaba ma aki anga te amwarake nakon te maiu ae akea tokina. Ibukii tabeman, Ana “taeka aika matoatoa” boni ngaia bukina ae aki ira Kristo.

Te Mwakuri ni Kamaiu

Tokin ana mwakuri ae mamate ara Tia Kamaiu bon Mangautina ao Ana Mwakuri ni Kamaiu ibukin ana bure te aonaaba. E taetae ni burabetiia aei Ioane te tia Bwabetito ngke e kangai, “Noora ana Tiibutetei te Atua, ae uoti nako aia bure kaain aonaaba” (Ioane 1:29). Imwiina e reirei Iesu bwa “Natin te aomata E roko ... bwa E na toro irouia aomata, ao bwa E na anga maiuna bwa unoraia aomata” (Mataio 20:28). N te Kabanea ni baka, E kabwarabwara Iesu, ni kaineti ma te rongorongon ni Mataio, are te wain are E a tia ni kakabwaia bon “rarau aei ae aran te berita naba ngkai, ae kawawaeaki i bukia aomata aika bati bwa bwaini kabwaran aia bure” (Mataio 26:28).

Ni kaoti nakoia Nibwaite, te Uea are E a uti E kaoia bwa ana kawaria n namakina te maneka Irarikina ao mwiin taian neera inanon Baina ao Waena. E karaoa aei, E kabwarabwara, “bwa kam aonga n ataia bwa boni ngai Atuan Iteraera, ao Atuan aonaaba aw bwanin, ao I a tia n tiringaki ibukin buren aonaaba” (3 Nibwaai 11:14). A, e waaki nako te rongorongon, aomata aika uanao a bwaka “inano i waen Iesu, man taromauria” (kibu 17). Ibukin aei, ao n tokina te aonaaba a na bane n Taromauria.

E reirei riki tabeua koaua aika kakawaki Iesu ibukin Ana Mwakuri ni Kamaiu. Ana Boki Moomon, are e kamatatai ana reirei te Tia Kamaiu ao n anga te kabanea n tikiraoni ni kabwarabwara n Ana mwakuri, n ribootina te reirei aio:

“E kanakomaiaia Tamau bwa I aonga n tabekaki rake iaon te kaibangaki ..., bwa n na burimaunia aomata nakoiu, . . .

“... bwa a na motikaki taekaia man aia mwakuri.

“Ao ...ane e raira nanona ma ni bwabetitoaki n arau e na nuai; ao ngkana e teimatoa n uaa te toki, nooria, e na bon akea ana bure imatan te Tama n te bong arei ngkana I tei ni motika taekan te aonaaba....

“Ao akea te bwai ae bareka ae kona n rin n uean te [Tama]; ngaia are akea ae kona n rin inanon ana rau ma ti naake a tia n te boki aia kunnikai n raraau, ibukin aia onimaki, ao aia rairannano man aia bure, ao aia kakaonimaki n uaa te toki” (3 Nibwaai 27:14–16, 19).

Ao ngaia ti ataia bwa ana Mwakuri ni Kamaiu Iesu Kristo e anganiira te tai n tokanikai iaon te mate n tamnei are e riki man te bure ao, rinanon karaoan ao kawakinan berita aika tabu, ni karekei kakabwaia n te maiu are akea tokina.

Te Kakaewenako ao te Koaua

Iesu E anganako te titiraki “Tera nanomi nakon te Kristo?” (Mataio 22:42). Te Abotoro Bauro e kaewenakoia I-Korinto bwa “kam na katai ngkami, bwa tao kam mena n te onimaki” (2 I-Korinto 13:5). Ngaira ni kabane ti riai ni kaekai taian titiraki aikai i bon iroura. E nga ara kabanea n onimaki? Ti tebo ngaira ma Kiritian n aron ana kabwarabwara Unimwaane Neal A. Maxwell ae kauringaaba are a tia ni kamwainga aia maeka nako Tion mani kataia ni kateimatoa te kauoua ni maeka i Babylon.¹

Akea te tabo ae kaokoro. Ngaira bon taan irira Iesu Kristo. Ngaira bon kaain ana Ekaretia ao taan irira Ana Euangkerio, ti aki kona n ana te motirawa man te etieti ke ni mwakuri n aron temanna mai ibuakoia ana aomata. Ti riai ni karinea Arana, kawakin Ana tua, ao n “tai ukoukora bwain te aonaaba aei ma ukoukora ...moa ni karikirakea uean te Atua, ao ni katea ana raoiroi” (Mataio 6:33, man Ana Rairairi Iotebwa Timiti, Mataio 6:38).

Iesu Kristo bon *ti* Ana Riki Temanna ao Natin te Atua ae Tangiraki. Ngaia *ara* Tia Karikibwai. Ngaia Otan te Aba. Ngaia *ara* Tia Kamaiu man te bure ao te mate. Aio te kabanea ni kakawaki n atatai n te aonaaba, ao ko kona n ataia bon iroum, ngkai I ataia bon Irou. Te Tamnei ae Raoiroi, ae kakooua te Tama ao te Nati ao ni kairiira nakon te koaua, e a tia ni kaoti koaua aikai nakoiu, ao E na kaoti nakoimi. Te kawai bon te nano ni koaua ao te ongotaeka. N aron ae ko tangiria e reirei Iesu, “Bubuti, ao ane kam na anganaki, kam na ukeuke, ao ane e na reke i rouni, kam na karebwerebwe, ao ane ena kaukaki nakoimi” (Mataio 7:7). Ao n aron te ongotaeka, “ngkana e kan toua mwin ana

taeka Teuarei te aomata, ao e na ata te reirei, bwa tao mairoun te Atua, ke I taetae mai Rou.” (Ioane 7:17). I kakoauai koauan bwaai aikai n aran Iesu Kristo, amen.

Bwaai Aika Ana Taraaki

1.

Taraa Neal A. Maxwell, *A Wonderful Flood of Light* (1990), 47.